

Communicaziun allas medias, 29-03-2026

Gleich verda per igl Albiert da giuventetna Savognin

Las persungas cun dretg da votar digl cumegn da Surses on approvo la compra digl uriund Hotel Cube antras igl cumegn cun ena maioritad da 75 pertschent. Cun chella decisiun vign fatg liber la veia per utilizar igl edifezi scu albiert da giuventetna, tgi vign a neir gestiuno digls Albierts da giuventetna svizzers. Igl cumegn, la destinaziun scu er igls partenaris e las partenarias da project veian ainten chel pass en impuls impurtant per igl svilup turistic ed economic dalla regiun. La reavertura è preveida per l'antschatta dalla staschung d'anviern 2026/27.

Siva dall'approvaziun fitg clera davart dalla radunanza communal a igl favrer ò igl cumegn da Surses approvo igls 29 da mars 2026 all'urna la compra digl uriund Hotel Cube a Savognin cun en consentimaint da 75 pertschent. Igl cumegn pò uscheia acquistar igl bagn immobigliar tgi vign reavert scu albiert da giuventetna. La gestiun vign surpigliada digls Albierts da giuventetna svizzers (AGS/SJH), tgi magnan igl object per incumbensa digl cumegn. Cun chella decisiun sa sierescha igl cumegn en'infrastructura strategicamaintg impurtanta aint igl center turistic da Savognin. Igl edifezi da hotel cun radond 280 letgs scu er igl bietg annex èn veids siva da ples onns e duessan ossa neir utilisos danovamaintg.

Project impurtant per la destinaziun ed igl magnafatschenta

Igl cumegn, igl Tourismus Val Surses e las partenarias ed igls partenaris da project valeteschan la decisiun scu en pass decisiv per sviluppar anavant igl turissem ainten la Val Surses. Cun metter puspe an funcziun igl edifezi duessan neir generadas duple permottaziuns e migliurada l'utilisaziun dallas purscheidas existentas. Igl cumegn da Surses benevainta la decisiun digl suveran: «La reactivaziun dall'infrastructura existenta scu albiert da giuventetna è en pass central per igl svilup turistic dalla nosa destinaziun. Ella rinforza la creaziun da valour ainten la val, creescha plazzas da lavour e sa drezza a novs segmains da giasts. En ferm turissem è la basa da veiver per la nosa val», dei igl mastral Daniel Wasescha. Igl albiert da giuventetna planiso sa drezza surtot a famiglias, gruppas e scolas e cumplettescha uscheia la purscheida da permottaziuns ainten la val. El duess gidar a madem mument da posizunar pi ferm la destinaziun scu li da vacanzas durant igl antier onn.

Cun igls Albierts da giuventetna svizzers surpeglia en'organisaziun versada igl menaschi. Els on la gestiun d'ena reit nazionala cun actualmaitg 50 albierts da giuventetna e porschan antras Hostelling International ena visibilitad internaziunala scu er ena ferma distribuziun sen la fiera. «La destinaziun Val Surses è ena cumplettaziun preziosa per la nosa reit. Nous ans legragn da crear ansemen cun igl cumegn ena purscheida tgi atteira novs giasts e pussibiliteschas persistentas. Cun l'integraziun an plattafurmas an Svizra ed aint igl exterior duess igl nov albiert da giuventetna generar ena dumonda supplementara ed augmentar l'ancunaschientscha dalla regiun a lunga vista», dei la CEO da AGS/ SJH, Janine Bunte. Albert Kruker, CEO da Tourismus Val Surses Savognin Bivio SA agiunta: «Cun igl Albiert da giuventetna Savognin ins so augmentar aint igl avigneir las cefras da giasts necessarias per en svilup persistent dalla destinaziun, ed utilizar migler las nossas purscheidas. La posizun tranter la pendiculara ed igl lai da far bogn è ideala per en albiert da giuventetna. La reavertura dat igl impuls per ena retscha da svilupps turistics ainten la Val Surses. Nous ans legragn sen la collaboraziun.»

Igls proxims pass

Siva digl conclus dalla votaziun positiv vign igl cumegn a concluder igl acquist dall'immobiglia ed introduer igls ulteriours pass per la restauraziun e la messa an funcziun digl albiert da giuventetna. La fegnameira è da darveir igl albiert da giuventetna sen l'antschatta dalla staschung d'anviern 2026/2027.

Igls Albierts da giuventetna svizzers

La reit dall'Uniun Albierts da giuventetna svizzers sa cumpona da 43 albierts da giuventetna agens e 7 albierts da giuventetna associias – digl casti romantic, agl menaschi da design aint igl martgea anfignen agl hotel da wellness. L'organisaziun sainza fegnameira da profit registrescha mintg'onni passa 820'000 pernottaziuns. Aint igl focus dalla sia activitad stat igl turissem da giuventetna e da famiglias, tgi duess esser da buna qualitat, persistent e favorevel. www.youthhostel.ch

Igl cumegn da Surses

Igl cumegn da Surses aint igl Grischun è cun ena surfatscha da radond 325 km² igl quart grond cumegn dalla Svizra – ed egn digls pi extraordinaris. Situò agls Pass digl Gelgia e digl Set, unescha el 11 vischnancas, treis lungatgs e dus territoris da sport d'anviern a Savognin e Beiva. Igl Parc Ela, igl pi grond parc da nateira dalla Svizra, scu er igl festival da cultura Origen tg'è nia premiia ples gedas, fontgi Surses è en li unic, noua tgi la nateira, la cultura e la diversitad linguistica sa scontran an ena moda singulara.

Tourismus Val Surses Savognin Bivio SA:

La Tourismus Val Surses Savognin Bivio SA è l'organisaziun da destinaziun dalla Val Surses cun igls lis da vacanzas Savognin e Beiva. Ella è responsabla per la commercialisaziun, per igl svilup da products turistics e per l'assistenza digls giasts ainten la regiun. Cun ena vasta purscheida da stad e d'anviern contribuescha ella an moda decisiva alla creaziun da valour ainten la val.

Per ulteriouras infurmaziuns:

Albierts da giuventetna svizzers

Janine Bunte | CEO
Tel. +41 79 654 03 10
janine.bunte@youthhostel.ch
www.youthhostel.ch

Cumegn da Surses

Daniel Wasescha | mastral
Tel. +41 81 659 11 60
daniel.wasescha@surses.ch
www.surses.ch

Tourismus Val Surses Savognin Bivio SA

Albert Kruker | CEO
Tel. +41 81 659 16 16
a.kruker@valsurses.ch
www.valsurses.ch